

箕墩詩鈔

下

香外書冊

詩集文集

新

			二六四	和
		七八	四	書
		二八四	冊架函號類	門

庫	文	閣	內	
二六函		二六四	和	
一七架	二冊	八四號	書	

內閣文庫	番號	和 26484
	冊數	2 ( 2 )
	函號	206 414




A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak







篁墩詩鈔下

東游舟中

暮天遙歛落霞紅。回首茫茫潮拍空。三十六洋渾一色。片帆掛月廣陵風。

播浦二首

海驛煙收明月浮。須磨浦上不勝秋。一千年後人醒夢。殘霧啼禽淡路洲。  
謫去黃門昔不還。孤琴已落渺茫間。猶傳一曲廣陵散。月下松風舞子灣。

淺草文庫

周防 庄原懿彝卿 著

篁墩詩鈔下

八嶋歌

我能往寇亦往。當時棄都是失策。堂堂桓武歷世業。莫是一敗鬻田宅。憶昔八嶋之隅開半壁。西控九州南四國。犯我者除是飛來。詎識釜魚延頃刻。源家飛將健於鷁。疾風截過艦一隻。衝天巨濤如坦途。九萬里程大鵬翼。水戰三日飛霹靂。勢與洪濤共排擊。兕角可拔壯士腕。萬牛難挽強項客。七札鏃穿由基箭。雙鳧翔空玉喬鳥。楚人號哭漢人笑。千古厓山同痛感。遠山峩峩遠水碧。往事一夢年幾百。追想納言守都議。超絕滿朝婦女識。稜稜秋霜吹欲飛。舌端有鋒

森乃戟。自古死生元有命。男兒均死留死敵。與其區區俱葬魚腹中。豈如磨礪仗劍殉社稷。

謁楠河州公墳引

天地無光紅日沒。虞淵赤手誰捧出。木南有地容帝座。夢中天賚良輔弼。千劍破峯尖似劍。懸崖作城壑。作壑菊水旗章映日翻。揭舉大義激勇悍。蜉蝣百萬望城驕。一楠大樹豈能搖。朝生暮死不自寤。賊巢一炬先已燒。彤弓白箭紅韎韐。迎謁龍顏賀成業。旋見九鼎重泰山。似挽天河洗兵甲。吁嗟哉帝亦雄略主。何如倦勤苦。長舌婦鬼蜮臣。公肘掣帝心蠱。國勢一

去不可回。前狼纔斃，又後虎下馬。訣兒櫻井郵，遺誠再三苦不休。天賜寶刀今授汝，佩之勿敢忘大讐。蒼天欲墜黑氛結，雷鼓震地地軸裂。七合七離進益銳，兵心一一如符節。胄裂鎧破十一創，誓爲厲鬼滅姦猾。君不聞燕雲鞭捲岳家軍，黃龍府中約酣醺。十二金牌班師詔，一朝埋恨西湖墳。又不聞土木之變于忠肅，手支大厦扶傾覆。一腔熱血誓許君，灑向東市屠全肉。自古英雄事多然，不幸豈獨建武年。男兒闔棺事始定，竒禍何必咎蒼天。況公殉玉事，四世續先志。賊魁一夕迹爲煙，照墓煌煌八大字。嗚呼忠魂毅

魄邦家光，千百億萬年之後。南枝瑞兆留無限芳。

舟到攝州而作二首

依然形勢壓東周，憶昔雄圖卜宅秋。地控萬方橫巨壑，城標絕險壯神州。皇天已斷金烏兆，寒火猶吹哲婦謀。慷慨欲揮憑吊淚，暮煙無限入新愁。創業英風曠代無，想看宏遠舊規模。齊桓功烈攘夷狄，漢祖雄豪笑豎儒。遺室誰圖求牡雉，當塗再見假威狐。唯今餘勢歸何處，獨有俠夫呼擲盧。

攝州歌

一將之智有餘萬，乘之才不足此語。昔人稱魏武，我

今移作豐公目。坤輿三千六百鈞。足可簸掀手可覆。  
叱神鞭鬼雷霆。驚明韓之師崩厥角。寧識稅夫膏血  
乾。烏鳶往往啄胔肉。戰骨在邑顛在野。有時人立作  
人哭。突兀崇墉跨雲起。基址石罅錮五嶽。黃金撐斗  
斗柄傾。紅腐壓丘萬倉粟。悒悒誰待千歲後。快心只  
饜目前欲。噫吁何不且散餘財濟衆生。塑佛冷然笑  
受鏃。

建武南狩歌

鷹化鳩兮虎變鼠。眼可辨兮爪可覩。何如君王瞋其  
目。傳之羽翼傳之距。神龍失水忽奔騰。四海九州渾

泥土。跟跳魑魅又魍魎。五畿七道血漂杵。君本稱神  
武。倦怠實啓侮。內有巧音雌。能使君心蠱。養之代司  
晨。揖盜入門戶。一雛翼初成。未足登鼎俎。餒賊投其  
巢。抉裂遭烹煮。黃河南決豈北還。虞淵日沒誰復舉。  
古來良機不再來。滿目行宮化禾黍。君不見虞廷無  
虞相。警誠春風吹動九韶舞。

溯淀水

篙夫呼許挽夫邪。寒霧朧朧溯漢河。水枕一川間撼  
夢。瓜皮舩輾軟沙過。

江州道中

形管書成往事悠。秀才紫史擅風流。當年著作知何處。一片遠雲眉月秋。

勢南道中

阿漕浦上暮潮聲。鈴鹿山中淋雨鳴。多謝一樽松阪酒。滿簾紅燭玉人筵。

大津卽事

三井鐘沈雪欲飛。湖南煙樹望霏微。燈前醉卧猶如水。想到高堂舊侍幃。

渡湖二首

大湖寒水暮冥冥。帆捲凍雲過遠汀。依約比良風雪

色。船隕已失半峯青。  
雪片無端變雨絲。荻花楓葉也空時。琵琶湖上蓬檐滴。舟自嘈嘈聲裡移。

參河

才盛唐虞際。國開齊楚間。江深龍蟄處。雲起鳳來山。雄武提三尺。英謨定九寰。到今蒙德澤。實賴創基艱。

桶狹

帳中夜宴曉猶醺。昏黑乾坤合不分。破釜重瞳馳趙壘。銜枚死士突燕軍。一時戰血昆陽雨。幾疊僨屍崑隘雲。卒情將驕卿子語。騰騰當日惜無聞。

富岳

萬古貯冰雪。青空擎玉蓮。手捫參井近。天包夏夷圓。宵湧蓬瀛日。秋橫溟渤煙。如聞仙駕過。環佩響泠然。

富士河

紈袴何曾解。用兵東征叨。賜驛鈴榮元。知灞上真兒戲。不怪肥西驚鶴聲。三尺劍慙傳世器。六鈞弓怕挽強名。默思闔族諸年少。無復阿爺能老成。

黃瀨河

九郎膽氣九寰橫。幕下臚傳喚姓名。且喜家亡真有弟。不論身在竟難兄。同舟濟處越人救。狡兔死時功

狗烹。怕見鵲鴿原上草。暮雲寒月露淒清。

過函關有懷北條氏往事

山齧齧兮石粼粼。馬頭青落蜀北門。亦知子陽井蛙耳。漫以狝猴笑楚人。乃祖一劍取八國。兒孫重關亡親戚。吁嗟在德不在險。落落高峯沈太白。橫絕跨雲表。天心限九寰。一丸泥不塞。枉自棄函關。英雄歸一攬。民下約三章。政令牛毛似。兒曹自取亡。

鎌倉行

赤帝子斬白帝子。亭長掉臂爲漢王。小鼠成巢老馬尾。流人唾手吞諸平。回首五載取天下。鎌府恰與隆

準當亦見雄猜相伯仲。腹心委任外家強。芟鋤二弟  
如草艾。韓彭菹醢布烹。秋色蒼然八州滿。蛭鳴孤  
雲正飛揚。五彩猶含真龍氣。是君當日舊芒矟。泗水  
龍歸不復飛。豚兒孤立日酒荒。一呼北軍誰左袒。家  
僕諸呂化虎狼。身後安劉無一語。不怪禾黍終茫茫。  
噫嘻何不早歌大風章。留取二弟及猛士。內防外戚  
兼守四方。

土窖

長樂鐘聲恍不真。朝衣夢拂紫微塵。太陽非是有遺  
照。窮谷陰崖自閉春。

又懷建武之事作歌

神堯一旅取天下。後世天下苦河北。此事帝躬兩自  
踐。廟謀前後有失得。維昔大魚恣跋扈。神龍播遷怒  
方赫。偉哉龍種出緇流。糾合義徒贊密畫。飛騰彈丸  
黑子地。六十餘州歸版籍。豈知宴安耽內寵。又見姦  
賊伏肘腋。獻策爭得傲蒼鷹。鐵爪磨來振六翮。直擊  
妖狐擘皮毛。白日有光天宇碧。張羅本求兔雉也。反  
見獲耿介何乃然。牝鷄在君側。土窖漫漫卽長夜。一  
入無由得再覲。泣血唯待馬角生。倦眼不見烏頭白。  
申生死兮晉國亂。扶蘇刑兮秦祚易。金鑑千秋良不

誣回首銅駝卧荆棘。却惜當初尚方劍。姦頭可斬一人力。不然投裔禦魑魅。猶能不至虎生翼。乃知逸樂生近憂。色荒大禹有典冊。君不聞桓山之鳥別子時。呼號哀痛何啾唧。萬乘不能容一子。吁嗟乎奈此社稷。

青砥藤綱

南山手可移。此判不可回。我腕刀可斷。此批不可換。一宰不平四海惑。赤子化為虎狼賊。滑川撈錢是餘事。天下大寶只是直。君不見海內鼎沸建武年。乃由君王賜予偏。

早春偶成二首

襟帶山河昔建牙。文經武緯幾春華。八州兵馬無雙地。萬國衣冠奕世家。巨港斜開天漣限。百蠻倒照岳蓮花。依然遺烈典型在。齊晉規模莫謾誇。百二金湯瑞靄橫。萬侯玉帛此朝正。險同秦世關中地。威凜胡奴雪外城。洋警曾無石榴銃。天風吹徹紫鸞笙。廟堂元有不虞誠。勿玩昇平忘議兵。

墨水春遊十首

人事匆匆無了期。須尋春色醉吟卮。半宵花曆燈前雨。檢到今年櫻發時。

第四橋東花返魂。烏篷先繫水晶村。一簾影白春無色。兩岸香吹雪有痕。

不濃不淡妝尤豔。如醉如醒力稍微。竟是兩家風格遠。趙妃太瘦玉環肥。

鈿蟬金鴈雪兒箏。歌舞場中各擅名。三寸兔毫一片紙。能詩別有雀鶯鶯。

垂楊搖曳掩樓臺。誰自西湖乞得栽。不怪更多柔婉態。曾看蘇小舞腰來。

絕世名姝誰與儔。暗潮沈骨恨悠悠。濕香一道落花水。直到三叉咽不流。

紫綬歌殘沙鳥過。梅兒祠畔柳婆娑。東風吹綠蘼蕪色。偏向王孫墓上多。

筑波山暝斂眉稜。亞字欄干醉且憑。東望殘霞紅一抹。和他雪色落魚鱗。

芳雲一帶望霏微。無數春禽求宿歸。莫遣晚鐘容易搗。櫻花恐作雪花飛。

西北揚州月二分。海南沈蕪夜氤氳。一枝柔櫓歸篷底。夢宿津頭香暖雲。

春日雨中

雨中紅事又闌珊。人費吟魂倚曲欄。桃葉歌收簾影

濕杏花村冷馬聲寒。游如春夢終難續。愁似海潮曾  
不乾。回首年華真轉瞬。殘芳爭得趁晴看。

楊妃上車圖

鸞聲破睡帶餘醒。墮馬髻斜雲影傾。楊柳風輕弱無  
力。海棠露重濕含情。眉端紅汗珠猶迸。眼底橫波春  
忽生。誰料雨淋鈴一曲。後車不返鳳凰城。

暮春寫懷

黃閣青樓鎖暮春。寒煙遠水漲通津。縱令杜牧元狂  
士。其奈江淹是恨人名。妓冤魂芳草雨。王孫古塚落  
花塵。笛聲又起前村晚。一曲嗚嗚最愴神。

夏日偶成二首

竹枝歌罷雨絲斜。桃葉渡空潮打沙。一覺繁華塵土  
夢。南薰看到佛桑花。  
宦海風濤非易涉。學林秋實竟無期。小欄干外芭蕉  
雨。閱到漁磯舊製詩。

鴻臺懷古

二州割據擅江東。一勝何如假恃功。鐵鎖未沈前水  
底。虎兒已入後門中。敗秦楚將偏驕色。伏趙漢兵猶  
亂鴻。可惜邏巡君自解。整嚴長憶李家風。  
李光弼治軍雖敵不

至亦巡邏不解

墨水晚步

歸雲不成雨。搖曳度前。黃葉林間寺。殘陽鳥背山。  
櫓聲煙際急。人語渡頭閒。寒甚思微醉。星燈爛市闌。  
奉寄良齋先生在東奧

風骨超然元寡儔。山林多暇亦恩優。卅年聲價紅塵  
界。一夕雲煙春夢樓。白鶴高摩華表月。文星遠去武  
昌秋。紫陽宗派向誰問。回首茫茫東海頭。

奚所須窩稿歌奉謝良齋先生

奚所須窩稿竹  
村伯順所著

吾聞李將軍之射石飲羽。目中早已無全虎。又聞干  
將之劍淬其鏑。水斷蛟龍陸犀革。東海悠悠二百年。

筆力如此不多傳。詎識冀北生神駿。鐵蹄蹋破萬陣  
堅。遺編在師手。千里寵貺厚。大者韓蘇驚。小者楊范  
走。置之孤枕頭。有似群雷吼。想昔中夜傾樽壘。酒酣  
有神突如來。詞源忽倒天河水。一瀉頓見萬竒瑰。無  
端風雨海水立。老蛟慟哭穉龍哀。啾啾訴天陰雲黑。  
群鬼膽落何在哉。夜臺寂寞一片月。黃葉青苔掩忠  
骨。易水悲歌秋風寒。燕臺盛夏飛霜白。陶唐忽諸虞  
夏亡。許身稷契作國殤。魂兮魂兮何所往。空望蒼梧  
雲渺茫。

題畫

修竹被清漣。人家在空曲。夕陽數峯紫。過雨一簾綠。  
遊王子村

西風剪剪夕陽斜。霜葉林間賣酒家。醉眼模糊武陵  
似。一灣紅漲滿溪花。

聞本城先生訃

如夢如雲人已仙。招魂遙對舊山川。遺詩誦到香爐  
句。冷鴈哀猿暮雨天。先生有夢上廬山詩此為絕筆

秋聲

殘宵何物乍鏘鏘。夢覺山河帶月光。腐策誰吹天北  
角。波濤近撼屋中央。蔡城夜雪鵝群起。淝水秋雲鶴

唳長。最似石壕夫婦別。一聲痛哭斷人腸。

寄某氏在長崎

仙遊一枕是瓊陽。華帳夜薰真臘香。誰識籌邊樓上  
雨。陰符照讀漆燈光。

訪桂園篠田君次其所贈韻賦呈

楞嚴堆案未嫌遲。葵藿丹心老自知。金馬玉堂他日  
夢。殘燈冷酒此宵詩。入門流水停無響。出岫閒雲歸  
有期。看取好花多薄命。幾絲紅淚雨中枝。

春日送人

南浦綠波芳草薰。東欄梨雪白紛紛。客中消遣清明

節。細雨斜風又送君。

客中書感寄仲兄四首

生別兩顛逢豈難。慈顏奄忽杳無端。秋風又是到容易。夢入庭闈猶問安。

承歡事事每多愆。思到庭闈輒惘然。一語寄君君了取。不聽桃葉已三年。

西奔纔罷又東馳。曾費閭門幾度思。偶見老鷄栖不穩。天涯應有未歸兒。

風酸霜苦太艱辛。卯翼多年師氏仁。七十餘齡猶憫我。生前恨不把眉伸。

櫻井驛址歌

黑浪衝天天氣惡。山岳搖搖老鯨躍。陰風中人金僕姑。五月淒愴寒氣作。誰歟出拒楠廷尉。竒策君王已排棄。戎服臨歧卽此鄉。遺訓告兒再三四。汝能萬死作長城。殉國勿忘乃父志。武庫一稊烽火高。軀命直是比鴻毛。熱血一腔爲君灑。留兒且作護身刀。南望芳野愁雲結。畢逋烏啼苦竹裂。南枝不見北風寒。西山欲落半竿日。君不見威鳳生雛時。未必卽分離。鷓鴣弄舌鳳已死。五色鳳雛又離披。

觀北野菅廟加藤公所納鏡引

古廟熒熒開明月。背有地影溢素魄。誰是納之藤肥  
州。或要金甌無一缺。想昔豐公掌握中。欲併明韓比  
寸壁。先把神州雕鏡背。日光所照次第伐。公也綠髯  
承寵賜。七道軍營隨指畫。聚米已壓馬伏波。茹肉又  
同虎頭客。咸鏡道北捕鸞雛。元良哈南拂胡羯。一鞭  
欲絕鳴絲流。珊戈夜枕蔚山雪。自從金烏忽墜地。公  
亦歸來霜侵髮。城中孽狐藏首尾。蠱惑煽亂畫出沒。  
方寸不減照膽鏡。隻眼看破姦肺膈。蚩尤旗坼關原  
天。自此乾坤成一革。卓錫之外無寸地。六尺遺孤誰  
扶掖。是時慷慨氣益壯。屹立中流高砥石。一劍聊酬

故君知。百鍊豈爲繞指鐵。寥寥幽憤誰能解。獨有菱  
花照苦節。憶起相公調鼎際。一身獨負天下責。宰相  
須用讀書人。鑿鑑未賜已賜玦。惟公目不識一丁。磊  
砢只餘中心赤。一鏡纔捧一鏡亡。得失茫然誰復別。  
天之所廢不可支。古今盈虧幾變易。高臺祠兮方廣  
寺。艦材半朽銅仙裂。獨有精誠凝鏡面。千秋一片澄  
潭白。

小樓雜吟十首

簡朴衣冠是古風。小樓纔隔市塵紅。借他柳暗花明  
態。已在放翁詩句中。

冰柱紅牙嘗聽歌。司航錄事有仙娥。今宵豈但散桃李。我亦歡場春夢婆。

流水娟娟小石顏。遠鐘何處度花來。一逢殘雪畿南路。夢記隴明月。瀨梅。

水煙潑墨板橋頭。柳樹模糊涼影浮。一幅橫圖君且見。子昂牧馬戴嵩牛。

椎髻荆釵短布襦。流年容易汗成珠。吳綾疊雪且休說。曾記牛衣對泣無。

夜深人定市聲幽。無復歌謠落枕頭。踈雨梧桐琴筑滴。小詩和到韋蘇州。

沙禽嘎嘎雨淒淒。喚過幽厓竹樹西。下枕秋風吹遠夢。黃陵廟外鷓鴣啼。

銀絲蕎麵捲滹沱。人去店頭沙鳥過。憶昔一枝蒼竹笛。扁舟吹月下須磨。

小欄干外雪婆娑。澹澹黃雲遠遠波。剪取灞橋煙半段。惱人詩思不須多。

凍月一九風有鉞。陰符讀罷夢淒涼。分明冰海髑髏枕。雪灑梨花戰血槍。

題畫

幽蹊入翠微。秋露月生輝。古寺僧歸處。白雲崩欲飛。

舟中夜歸

空江秋欲來。風柳搖涼影。娟娟水中月。相隨送歸艇。  
汀禽時一鳴。虛明湛夜景。

墨堤卽目二首

堤柳浮涼影。雪蓮含落暉。歸帆蒼靄際。一片帶秋飛。  
煙靄筑波際。依稀雙髻鬟。晚風散霞綺。那處赤城山。

墨堤曉步

朝暉開宿霧。天際筑峯來。白鷗掠水飛。片片任所之。  
予亦悠然去。巾袖清風吹。秋葉黃蘗寺。霜色白髭祠。  
忽過梅兒塚。一燈悄虛帷。人世皆夢幻。彭殤無兩歧。

隱隱煙中鐘。一聲醒凡思。

送人之鎮西

一片青山千古情。風濤秋起紫陽城。君看萬馬排擠  
勢。殲盡元軍是此聲。

送人赴任蝦夷

一。鷲。橫。天。海。氣。黑。黃。雲。剪。過。刀。劍。翮。片。片。飛。雪。大。如。  
掌。遠。自。鄂。羅。斯。城。北。蝦。夷。打。獵。血。洗。箭。面。實。虎。豹。心。  
良。善。古。來。衆。志。成。堅。城。此。輩。撫。可。備。百。戰。

湖上秋眺

寒雨過湖入晚秋。晴來遠色望中收。渺茫孤鷺爭霞

片滅沒飛鴻迷客眸。一面青山紅葉寺。半竿殘日白帆舟。何人樓上吹橫笛。暮靄冥冥無限愁。

雪舟晚渡圖

篝燈映雪影熒熒。山沒髻鬟臨遠汀。記得琵琶湖上夕。比良峯下卧揚舲。

早行所見

層冰封衆壑。宿霧沈禪閣。初日半山紅。無風松雪落。

卽事

讀易空齋夕。道心清不眠。寒梅半簾雪。幽竹一溪煙。

墨陀雪景

山蹙雙蛾含遠愁。沈沈鐘響入雲流。落花長笛玉孫墓。飛絮輕艘桃葉謳。紫綬歌殘沙鳥沒。金波樓鎖暮煙幽。祇餘玉筍浮圖色。倒照澄江林杪抽。

留客

美味雖無有。請君須盡酒。吾家銷夏灣。殘雨在高柳。不忍池

佳麗州中碧玉泓。觀蓮宜雨又宜晴。齊紈小扇幽香國。淵客輕綃不夜城。月帶殘鐘花外落。煙埋孤廟水邊橫。澹妝濃抹渾堪弄。好把西施亦此評。

子昂水邨圖

短短垂楊獵獵蒲。秋風一夕長銀鱸。每朝賜膾淋池上。曾憶吳江舊味無。

矢口祠

楚澤膠舟可奈何。錦囊盛矢志空磨。誰圖帳下虞姬在。忘唱當年莫渡河。

梔原景季箴上插梅花圖

箴上一枝梅影斜。東風薰徹敵城霞。惜他生箇寧馨者。剪盡王家棠棣花。

源廷尉

斬鯨銳氣吐光芒。逆櫓嗷嗷言太剛。能把寬柔制讒

慝。古今惟有郭汾陽。

畠山重忠

東海有一鳳。邈然謝鵷鴻。且與鷹鷂伍。將門下梧桐。君不聞旭將軍。敗亡粟津口。女丈夫馳騁草靡風。隻手捉鎧鎧袖斷。敗鱗散亂雪花紅。又不聞鐵拐之峯。何靳絕。驀然拔地摩蒼穹。八尺龍駒負在背。直下真與坦途同。桓桓已冠三軍勇。靄靄每讓百戰功。霜威不言自嚴肅。春風融在赤心中。蒼蠅豈污荊璧色。南冠曾感楚囚躬。忠奸却異死生路。二股河流恨無窮。

江樓觀驟雨

飛雨颼颼下黑雲。疾風雷電大江濱。千斤強弩射潮  
退。百道神兵蔽野分。放炬周郎燒賊艦。沈舟項羽赴  
秦軍。須臾萬里天如洗。一片青旗已夕曛。

浦賀

天水合爲一。混濛不可分。金波搖夜月。鐵笛裂秋雲。  
海闕魚龍氣。沙團鴈鶩群。無虞廟堂誠。邊警未曾聞。

銚子港

暮色蒼然銚子灣。西來秋滿太荒間。馬蹄蹴雪濤聲  
壯。鵬翼搏天雲氣還。夜月笙歌南港地。金風鎖鑰北  
門關。鄂羅沒吉知何處。不見窮陬一髮山。

墨水尋梅四首

認雪認雲渾不真。斷魂月淡一枝春。昨宵讀徹梅花  
譜。猶是朦朧夢裡人。

模糊閒鶴琴僧寺。依約殘燈學士亭。煙隙一鑽香若  
水。酒旗風影半簾青。

欄角臨風笛一枝。玲瓏寒玉半離披。湖居十五年前  
跡。猶記短篙撐雪時。

一篙寒碧水茫茫。潑刺銀刀三寸強。憶得家江煙雨  
際。魚簪和雪帶微香。

謁四十七士墓引

古今快死豈有此報讐四十有七士事屬元祿壬午  
年荒塚如山猶纍纍憶昔大雪寒墮指酒樓夜深歌  
拊髀袖中鐵椎重千斤懷底七首飲泣視誰是執牛  
耳沈勇大石氏指揮驅風雷談笑役神鬼白兔橫空  
凍欲死霜華上徹寒秋水戰酣淋漓血洗雪太乙下  
視膽亦駭問世大讐只尺椹久矣衆怨淪骨髓身含  
一笑入九泉氣亘萬古橫四海嗚呼戴天之仇古所  
恥能圖報舉曾有幾食人之食死人憂彼其忘讐是  
犬豕白楊日落暮雪起浩浩長風來千里孽狐不鳴  
幽草間猶見劍氣貫月紫飛蘭土兮金剛壘西有鄭

氏南楠子乾坤又見君曹出果然東方本鍾美。

春游卽事

昨夜流澌始滿川霞含春樹草芊緜嬌歌隔院箏雙  
調輕槩尋花酒一船孤閣踈梅何水部曉風殘月柳  
屯田吾生隨處多行樂不是狂仙是散仙。

呈太華山縣先生

思別春風過十年靈光遺殿自巍然手回閩洛頽瀾  
勢筆執麟經雄鉞權舉白秋高瑤浦月研朱露滴鶴  
江天數行書蹟千金賜比我佩韋兼佩弦。

歲杪雜興八首

天地容狂客。生涯甘豎儒。詩成寶燕石。官濫弄齊竽。  
居有寒氈坐。飲思春酒壚。年年饑僅免。小鬼莫揶揄。  
功名曾不得。而亦免途窮。境只平爲福。才因拙却工。  
灘聲孤枕雨。梅氣一樓風。聊此安吾跡。生涯是雪鴻。  
薄倖杜樊川。清寒賈閭仙。此情兼兩在。何幸各相全。  
桃葉春風酒。梅花雪夜船。悠悠從所適。且送一年年。  
天上鸞翔衆。池中鯉躍多。顧身無燕頤。結社有鷗波。  
壁後層冰合。夢餘柔櫓過。他年問生計。風雪一漁蓑。  
鐘從霜夜凜。牕納月華虛。高卧空齋客。先拋一卷書。  
夢中曾信夢。驢上漫求驢。諸念斯時滅。悠然靜有餘。

殘燈虛幌夢。歷歷記曾遊。秋雨雲中屐。春帆雪裡舟。  
岳蓮湖底裂。王氣洛南流。却恨諸亡友。相逢等聚漚。  
細檢百花譜。閒呼竹葉盃。醉來殘夜夢。寄在去年梅。  
雪意鐘先濕。江聲石欲頽。萬家正寒甚。被底已春回。  
急雪高樓夕。豪來試一登。饑鷹兩毛血。健馬帶冰稜。  
青凍酒家旆。紅沈禪室燈。壯圖無所用。岑寂又誰憑。

元旦

陌年薰化及人多。新聽酣歌湧似河。豈有蠻夷敢污  
鱗。情知鼎鼐協調和。祥雲靜鎖北門鑰。麗日全澄東  
海波。草創仰思廟謨遠。斯生未忍問巖阿。

詠史七首

四海困窮郿塢成。遷都車馬又軒輶。燃臍未快蒼生  
氣。一病天教踏火坑。

萬死投荒太苦辛。笑他嘗膽亦猶人。君看蛭鳩神龍  
雨。釀作一時天下春。

鳳闕愁雲鸞駕遙。鎌臺大樹雨蕭蕭。兒孫有脚陽春  
力。不贖滔天罪幾條。

果出乾坤一獼猴。茫茫滄海竟橫流。前身慣見狙公  
術。手裂蜻蜓愚幾侯。

越州已聘甲州通。畿甸荊榛隨手空。秦世遠交近攻

策。二千年後有斯公。

丹陽食母鷓鴣吻。京刹噬君家狗喉。怪底女貞花一  
種。芳香抱死北風秋。

千騎東方屯似雲。羅敷夫婿自高勳。何如奪婦桃園  
裡。不及區區一使君。

暮春寫懷

豪竹哀絃酒幾巡。曉鐘又送滿城春。愁兼殘燭彈紅  
淚。夢和落花渾舊塵。無賴薜蘿門外遍。有情鶯子枕  
邊親。明年再度縱成醉。豈復劉郎今日身。

慈鴿怨

有鵠東郭外。雌雄巢佛閣。黃口羽毛成。啁啾病日惡。  
雌留覆衰翅。雄去求良藥。良藥天一方。一舉凌碧落。  
天風六翮摧。雲路夜寥廓。歸來藥在背。子母死已昨。  
回翔不能去。胸臆血淚濁。嗚呼予何辜。旻天忍太虐。  
憶予鞠子初。中心日脍削。初月低弓影。尚懼觸矰繳。  
雲羅布四面。或恐陷鼎鑊。一朝孽及母。予辜實自作。  
維鳩兮有婦。維雉兮有穀。浩蕩天地間。一身將安託。  
神龍播蕩光滅沒。雨箭颼颼萬弩發。泥中蟠屈知何處。  
白日晦冥愁雲結。慨然仗劍出間道。山陰行認鑿

兒嶋高德題櫻樹歌

輿轍。一領雨衣換鐵衣。手捋虎鬚入虎穴。五色雲殘  
寒夜靜。紅冰淚凝神龍咽。三寸毛錐十字詩。墨痕入  
樹和心血。嗚呼八幡公平薩州。由來此樹屬英傑。一  
腕力挽九重春。忠節芬芳三月雪。

讀宋澤傳

天生留守復皇都。高廟自甘安一隅。回駕疏徒勞萬  
語。渡河魂尚聽三呼。乾坤有恨英雄淚。社稷難扶庸  
懦夫。他日岳王墳下魄。相逢泣說舊京無。



